

Jems Kumwimp Pas Mekia Akwapnámp Kar

Jems te Jisasomp nánae. Mao te Jerusalem mekamp sios mek yakápnap koumteouráp arop taokeyakámp.

Jemso má pas Kristen koumteouráp arop piríkimpea ankwap fi mek paokop napampor kumwimpon. Mao má pas kumwimp te Jisas sumpwia pok tenánko, 20 a, 30 yopwar niamp arake feki námpon.

Jems te Kwaromp koumteouráp aropan kwapwe kare ninikaok paokop mwanap yénk naenámpria mámá kar kumwi námpon. Tá Jems ankwap kar sénámp te, ‘Arop Jisasén mér námp mwar kwaporok yak naeane. Ankár kwapwe kare ninik méntér yak kun’rá sénámpon.

¹ Ono Jems ono Kwar ntia Jisas Krais Tokwae Karamp tére konamp aropono. Ono éntér-sámp ramp Israel fi yumo yumokuráp némp pwatea tukupea ankwapamp apárok yakáp napantá, yiráp por má pas má kumwiaka ‘Gude’rá sér rae.

Nkwakwe make kar kwatae korop námp te nomwan kárákáre sápnámp kar

² Ononamp arop fákáre, yumo te nkwakwe make touwe kwatae korop námpán kor, Am te fwap warákár mwanámp ankankrá ninik kipo.

³ Yumo te wae mérono: Nkwakwe make touwe yiráp méran mokop nap nke naeria korop námp

te, am támao kárákáre sánk naerámpara, īnkirman námpritea kárákáre fek fokopeyakáp kipo. ◊

4 Aeria maok, nkawakwe make touwe korop námpan kor, kárákáre fek yakáp napo maok, am taknap nínik kwapwe tokwae kari yak nánko, yumo te yae-párák yakápria, Kwaromp nínikan kor épérép mono, ponankor fwap pwi mwanapon. ◊

Arop nínik kour sámp naenámp kar

5 Yumo ou mekamp arop ankwap yonkwae kour mo námp kwamp te, mao ankár Kwarén sénánko, Kwaro man fwap sánk naenámpón. Kwar te ponankor aropan kápae kare ankank nénk konámpara, aropao man ‘Ankank sápae’ ria kar toropwap napo te, mao yopor mo i konámpón. ◊

6 Aeno am arop te Kwarén mér kareria kar toropwap naenámpón. Mao fwapia mér moriaka arakrá nínik naeane: ‘Kwar te onan fwap sáp kun ni, mokop kun?’rá nínik naeane. Tak níniknámp arop te, solwara ouwirao nánko, náre mwaek ak-wapránknámp niampon. ◊

7 Am taknámp arop te Kwar Tokwaerao námwan ankank sánk naenámpán mpwe nínik naeane, mono.

8 Am aropamp nínik te ankáránk nínikaok saráp mono, kápae kare níníkria, mao apae naenámp tére te fwapia yonkwae kour fek tére mo i konámpón. ◊

Ankankráp arop ntiaka ankank monámp aropamp kar

◊ **1:3:** Ro 5:3-5; 1 Pi 4:13-14 ◊ **1:4:** Mt 5:48 ◊ **1:5:** 1 Kin 3:7,9-12;
Mt 7:7 ◊ **1:6:** Ais 57:20 ◊ **1:8:** Lu 16:13; Je 4:8

9 Táte Kristen ankwap ankank mo námp kwamp te, fwap warákár naenámpón. Am te apae riteanápe, Kwaro nke námp fek te ankankráp aropria e tokwaeráp arop yak námpon. ☀

10-11 Aeno Kwaro ankank kápaenámp Kristen aropamp ankankan kánanke kwataenorá ninik nánko te, warákár naenámpón. Am te apae riteanápe, kápae kare maniráp ankank koupoukour mwar kar nap te am fárákap te apwar fuao yámar tákap nánko, yonkwae konámpnámp araknámp am tére nap meknámp sumpwi mwarea napon. ☀

Kwaro arop kwatae ninik fek warámpá akwap mo i konámp kar

12 Arop nkawakwe make touwe korop nánko, īnkírman námp ritea fokopeyak konámp te warákár kuno. Táte mao am kar ponankor wampwe kwaeria pwaránko te, Kwaro man yiki yak konap nopok am tak námp fek sánk naenámpono. Kwar te arop ponankor man warákár tokwae napan ‘Nopok sánk nanamp’rá sérimpaok man kor takrá sánk naenámpón. ☀

13 Táte arop ankwap man mokopon nkenaenámp kwatae ninik korop nánko te, ‘Kwaro onan mámá ninik sáp námpono’rá ninik naeane. Am kwataenámp ninik te Kwarén nikir-sankorop mo, tá Kwar te aropan ‘Kwatae ninikae’rá sér mo i konámpón. ☀

☀ **1:9:** Jer 9:23-24; 2 Ko 6:10; Je 2:5 ☀ **1:10-11:** Lu 12:16-21; 1 Ti 6:17; 1 Pi 5:5 ☀ **1:12:** Dan 6:1-28; Lu 6:22-23; Je 5:11 ☀ **1:13:** 1 Ko 10:13; 1 Pi 2:11

14 Aeno nomoku nomp ninik ankákárankao maok, fárámprá érékép akwap konámpono. Nomokuráp am ninik kwatae támão nomwan kákámánkariaka kwekárianánko, nomo am ninikaok tukup konámpono.

15 Am ninik támão takrá akwapea, táráp yak námp niamp tokwaeaka, yupuao táráp tank konámpnámp taknámp, kwatae ninikao kor akwapea tokwaeria sumpwi sámp-pap konámpo.

◊

16 Ononamp fákáre kare, yumo takria am kwatae ninik taki yakanoria pwate napo, yumwan poupwékáptáno.

17 Ankank kwaporok sánk konap ninik kwapwe kare, tá Kwaro sánk konámp kwapwe kare ankank ponankor yámar meknámp ék konámpo. Am te yámar mekamp ponankor wae yoroinámp Naropwar Kwaro nompor sámp-kérép konámpo. Am Naropwar te náráp ninik pwarará, warko ankwap ninik sámp mo i konámpo. Mao te aropamp wunérirao koumounek yámar fek wunéri éritea, yámar kuk nánko wunéri fae konámp niamp taknámp mono. ◊

18 Mao te námokuráp ninik fek nomp Naropwar yak námpo. Nomo maomp kar kare fek forokari námpo. Aenámp te nomwan ponankor arop fi ntia nape firamp nae fi yakáp mwanaapria yoroi námpo. ◊

*Kwaromp kar wawiaka mántwaok tukup
mwanaámp kar*

◊ **1:15:** Ro 6:23 ◊ **1:17:** 1 Jo 1:5 ◊ **1:18:** Jo 1:12-13; 1 Pi 1:23

19 Ononamp fákáre kare, yumo te ankár mámá ankankan fwapia mérenke: Yumo ponankor ankár kar wa mwaria koupour nánapria maok, yumo nopok koupour kar yopori kwapono.

20 Am te apae riteanápe aropamp yopor yonkwae pwarámp te arop ninik mek yae-párák kare ninik sámp-pap mo i konámpón. [◊]

21 Ae konámpara, yiráp ninik mek oumnámp ninik, tá nkawakwe make kwatae ninik te ankár ponankor nkwampok tirá épér kipo. Aeria maok, sánánkar porokwe fek yakápria, Kwaro yiráp ninik mek sánknámp karwaok paokop napo maok, am kar támao yiráp waemp warko warámp naenámpón. [◊]

22 Aeno yumo sámpnap kar máte kwaporok wawi pwar kwapono. Ankár ampaok paokop kipo. Aeno yumo kwaporok wawi pwar nap te, yumoku támao kwekár napon. [◊]

23-24 Táte arop ankwap Kwaromp kar wa námpao, ampaok akwap mo námp te, wunéri kour meknámp námokuráp yimetáp wunéri nkeanámpao, paprá youmpria, yimetáp nke námp nik mo, pwar konap niamp taknámp napon.

25 Aenapan maok, Kwaromp lo kwapwe kare te nomwan kwatae ninikao sámp-fákeyak námp mekamp éréképeanánko, amwar yakáp i konámp te, yae-párák karenó. Tá arop ankwap am lo fwapi nkea pwar mono, ampaokrá yárak nánko te, Kwaro maomp tére kwapwe kare pap naenámpón.

26 Táte arop ankwapao arakrá ninik: “Ono te kwapwe kare Kristenara, Kwarén kare kar lotu i

[◊] **1:20:** Snd 10:19; Sav 7:9; Mt 5:22 [◊] **1:21:** Kl 3:8 [◊] **1:22:** Ro 2:13

konampono.” Makrá sénámpao maok, námokuráp kar te fwapia poukwap mono, námokuráp ninik mek kwekár námpón. Aenámpara, maomp mér ntia maomp lotu námp te kwaporok párak táman námpón. ☩

²⁷ Kristenamp ninik ankár kwawpe kareria, nomp Naropwar Kwaro nke námp fek yae-párak kare yakáp i konap te ará: Kweri tárápu, kae koumteouran warámpea yakápria maok, yaewour i konapon. Tá ankwap te, nomo ankár nomoku nomp paokop fwapi taokeyakáp nánko maok, mámá apár mekamp nkawakwe make ninik nomp ninik mek koropea Kwaro nke námp fek oumi pap mo naenámpón. ☩

2

Ponankor aropan ankárankamp puri fek aropomp mwanámp kar

¹ Ononamp fákáre, yumo nomp Jisas Krais Tokwae Karan mér nap te, mao te wae kwawperáp Tokwae Karono. Aenámpara, yumo e tokwaeráp aropan saráp yae-párákria, e moráp aropan younkwe sánk mwanape. ☩

² Aeno arop ankárankao, ankank kwawpe kare yiríria pwarará, gol meráp yae topwe fek yirimpea yiráp lotu nap mek yoump nánko, tá ankank monámp aropao kor siot ankank kwatae yirimpria, mao kor lotu nap mek yoump nánko maok,

³ yumo arop siot ankank kwawpe kare moporinámp aropan yae-párákria sérrá, ‘Amo

✩ 1:26: Sng 141:3 ✩ 1:27: Ais 58:6-7 ✩ 2:1: Ap 10:34; 1 Ti 5:21; Je 2:9

te sia fek mapek tankae' ria pwarará maok, tá ankank monámp aropan sérrá, 'Amo te tapek fokopeyakae'rá sérrá, tá 'Ono fokopeyak namp fek apárok mapek tankae'rá sér mwanaape.

4 Am yumo taknap nínik te yiráp ankwapyaenápén yiráp nínik fek yurukupia kwatae nínik napon. Yumo am tak nap te, arop kotnámp aropao kotrá kwatae nínik fek yurukup i konámp niamp napon. [◊]

5 Onomp kémpiyae fárakap, yumo fwapia wawenke! Arop arop ponankor nke nap fek ankank monámp arop te, Kwaro man náráponorianánko, mao Kwarén mér námp mér tokwaerao maniráp arop niampi yak námpon. Arop man warákár napan, éréképeaka námokuráp arop firént pwar nanampri námpon. Aenánko maok, am ankank monámp aropao kor, am mek mént yakáp mwanapri námpon. [◊]

6 Aenámpan maok, yumo am ankank monap arop lotu nap mek korop napan pwarápae sánk konapon. Yumo te waeman mér napon, ankankráp arop te yumwan nkawakwe make sokororá paokopria, yumwan éréképá tukupea kot i konap te mér mo napon? [◊]

7 Kwaro yumwan Kraisomp e kwapwe kare ták-pap námpan maok, am ankankráp arop fákárerao am eran wourouump konapono.

8 Nomp King Kwaro lo ankáranks maomp Buk fek arakrá sérimpon, "Amo amokuráp pourouan warákár konapnámp taknámp arop ankwanan kor

[◊] **2:4:** Jo 7:24 [◊] **2:5:** Mt 5:3 [◊] **2:6:** Ap 16:19

warákárampo.” Aeria maok, yumo am lo karwaok tukupria te, yae-párák kare níník fek paokop mwanapon.

⁹ Aeno yumo arop ankwapan saráp kwapwe kare námprá niníkria, ankwapan te kwatae námprá niník mwanape. Yumo am takria te, kwatae niník napon. Yumo am tak nap te, am loao yumwan lo ták-sinaprá yénkép námpon.

¹⁰ Aeno arop ankárankao lo ponankor mántwaokria maok, ankárankamp lo ták-pwar námp te, mao lo ponankor ták-pwar námp.

¹¹ Nomo te wae mér námpon, Kwar te arakrá sénámp: “Yumo yupuráp arop, tá poumaropráp koumteou, yumo te kokopori kwapono.” Tá ankwap sénámp te: “Arop sámp-wouroump kwapon.” Aeno tátē kokopor mo napao maok, arop ankárank sámp-wouroump nap te, am te amo wae lo kar kwe-pwar napon. [◊]

¹² Kwar te yumwan fwapia papnámp loran yurukupia yiráp níník yurukup naenámp. Aenámpara, yiráp níník, yiráp kar ankár am loaok tukup kip.

¹³ Aeno arop ankwapao ankwapan yonkuae touwe moianámp te, man te Kwaro yurukuprá kot námp fek te man yonkuae touwe mo karenono. Aeno arop ankwapan aropomp i konámp te, fwap kot kwe-pwar naenámp. [◊]

Kwarén mérnámp ntiaka tére kwapwenámp kar

¹⁴ Ononamp fákáre, arop ankwapao sérrá, ‘Ono Kraisén te waeman mér kare namp’rá sénámpao maok, mao kwapwe kare níníként tére mo námp

[◊] **2:11:** Kis 20:13-14 [◊] **2:13:** Mt 5:7; 6:14-15

te, maomp mér te kánanke kwataeno. Am take pourouráp mér te mokopia man warko warámp naenámpanáp, mo karono.

¹⁵ Aeno yumonap mekamp arop ankárak, yupu ankárakao fir mo, waempyamao kor mo nánko, námpare nánko,

¹⁶ yumo ankwapao man sérrá, “Amo yae-párák yakria maok, akwapea amokuráp waempyam sámpaea waráp pourouk woukwapia maok, fir amokurápan sámpaea fárae.” Ae te yumo man fir ntia waempyam sánk moria, kar mwar sénapo te, yiráp kar mwar am te mokopia man yaewour naenámpon?

¹⁷ Am Kwarén mérnáp niníkao kor tak námpi yak námpón. Kwapwe kare niník mént yak mo námp te maomp mér te kwaporok yak námpón. [✡]

¹⁸ Aeno tátē arop ankwapao sérrá, “Arop ankwap fárakap te mérrá yakáp napon. Tá ankwap fárakap te kwapwe kare niník fek saráp tére napon.” Aerá sénapan maok, ono yumwan sérrá, ‘Yumo mér nap yénkép napao maok, kwapwe kare niník mént yénkép mo nap te, nopal ono kuri yae-párák kare niník fek tére konamp yumwan ono mér namp yénkép naenámpon.’

¹⁹ Yumo Kwar te ankárakamp támaonorá mér nap te, am támao saráp kwapwe kare nie? Am te kwatae yao-pwaerápao kor takrá mér napao maok, am fárakapao kor apáp tirinkrá kour me woukoura wae napon.

²⁰ Yumo te épérép kare napon! Yumo kwapwe kare niník fek tére moitea, Kwarén mér nap mwar-

[✡] **2:17:** Mt 25:41-45; 1 Jo 3:17

riaka, yumo kwapwe kare níník mént sámp moia te, yiráp mér nap te kánanke kwatae yak námpon. Ae te yumo te am kar fi mér mwaria nape?

21 Tak nap kwamp te, yumo wawenk. Wokwaek kar Kwaro nomp ounáp Abrahamo námokuráp táráp Aisakén Kwarén ofanámp sánk naeriaka alta mek pap naerianámp níník táman nkea maok, man sérrá, ‘Amo te yae-párák kare aropono’ rimpon. [◊]

22 Yumo te fwapia nínikenke: Maomp mér te yae-párák kare níník fek térerá yárap námpara, am takámp níník ntia mér támao pwi yakámpon.

23 Kwaromp Buk fekamp karao érik arakrá sénámpón, “Abrahamo Kwarén mér nánko maok, Kwaro man ‘Yae-párák kare arop’rá sérimpon.’ (Am kar fi wae kare kar korop námpon.) Aeria maok, Abrahamén ‘Amo te onomp nouroupono’rá sérimpon.

24 Aeno yumo oukoumwan te wae mér napon: Arop Kwarén mér námp mwar yak námp te, Kwar te am aropan te ‘Yae-párák kare aropono’rá sér mo i konámpono. Aeno mao Kwarén mériaka, kwapwe kare níníként tére nánko te, Kwaro man ‘Yae-párák kare aropono’rá sénaenámpón.

25 Ae konámpara, kokopor yupu Rahapo kor Joshua tirá kérépeakámp aropan yae-párák érékpá yakea ankwap mxae-párák tirá kérépámpantá maok, Kwaro man sérrá, ‘Amo te yae-párák kare yupuno’ rimpon. [◊]

26 Nomo te wae méron: Waemp pourouk woukoupeyak mo námp te am te wae sumpwi yak námpon. Ae konámpnámp taknámp arop Kwarén

[◊] **2:21:** Stt 22:9-12; Hi 11:17 [◊] **2:25:** Je 1:21; Hi 11:31

mwar mériaka yae-párák kare ninik fek tére mo námp te, maomp mérao kor arop sumpwi námp niamp takeno.

3

Nomo ankár fwapia ninikrá séر mwanámp kar

¹ Ononamp fákáre, Yumo ou mekamp kápae kare arop ‘Tisa tére mwar’ ria kíkiank mwanape. Nánkár wakmwaek Kwaro koumteouráp aropan yurukup námp fek te, porokwe fek yurukup naenámpón. Aeno tisa nomwan yurukupria te, kar tokwae sénaenámpón. [◊]

² Nomo ponankor kápae kare por kwapwe kare ninik mwarianámpao, ankwap ke fek tak mo i konámpón. Aeno arop ankárrankao sénámp kar kwatae mo, yae-párák kare námp te, kwapwe kare aropara, námokuráp pourou ntia ninikan kor ponankor fwap poukeyak naenámpón.

³ Arop fárakap te hosamp táp mek ain tákáre papea, paok tokorop tea, am fek samp-tankrá, mao akwap naerianámpao akwapanoria te, paok fek nikir nánko, am mwaek me kor sîrarrá akwap konámpono. [◊]

⁴ Yumo sipan kor ninikenke. Sip pourou te tokwaenono. Maomp stia te kánanke kwarokao maok, am sip ankwapmwaek akwapanoria te, kepteno am stia kánanke fek sámprá arákár nánko, am mwaek akwap konámpón.

⁵ Ae konámpnámp taknámp, top kor te pourouk yak námp kánanke kwarokao maok, kar tokwae sérar i konámpono.

[◊] 3:1: Ap 20:28 [◊] 3:3: Sng 32:9

Nomo wae mér námpon: Yaomwi énti kánanke santukupea yopwar pounkouroup napo, yaomwi yurunka waeria yopwar wouroukoupa waeriaka, yaopwe féperrá fékér i konámpono. [◊]

⁶ Top kor te yaomwi niamp takeno. Am te ankárark mwaek kírikíri pourouk yak námpao maok, mao te kápae kare nkawakwe make ninik tirá kák nánko, pourou mekmwaek ponankor oupouroup konámpo. Me tokwae mekamp yaomwi touwe támao arop táp mek pounkouroup tenánko, am yaomwi támao aropamp paokop ponankor wouroukoumpia kwatae pap námpon. [◊]

⁷ Aropao wokwaek yao pwae mekamp fir wunria, kou, ant, tákam, tá nkawakwe make éntécam koupoumpea wunia taokeyakáp napo, am fárákapamp yae ankore mek yakáp i konap te, oukoumwan kor tak napon.

⁸ Ae konapan maok, arop ankwap ankárarkamp te námokuráp top kor poukwap naenámp pourou mono. Nkwakwe make kar kwatae sérar námp te, am te fouao arop surumpwirá kák konámp niamp námpon. [◊]

⁹ Nomo te ankárarkamp top kor fek táman anánkaopwe kar sér i konámpo. Ankwap ke fek Kwaromp e sakaprá, ‘Kwar te nomp Naropwar, nomp Tokwae Kar’rá sér. Tá ankwap ke fek Kwaro nomwan yoroiaka námoku niampi papnámp aropan nomo kar kwatae sérar i konámpo.

¹⁰ Kwaromp e sakapnap kar ntiaka toropok kar kwatae, anánkaopwe ankárarkamp táp meknámp korop konámpo. Ononamp fi, am ninik te

[◊] **3:5:** Snd 16:27; 26:20-21; Sng 73:8-9 [◊] **3:6:** Mt 15:18-19 [◊] **3:8:**
Ro 3:13

kwataeno. [◊]

11 Ént me meknámp oukurnámp ént te, kwapwe kare ént, tá oukwe topnámp ént méntér oukur mo i konámpón.

12 Ononamp fi, ae te kwantae te fwap ouwip tank naenámp nie? Ae te souwe te fwap kwantae ki tank naenámp nie? Ankár taknámp kwapwe kare ént te oukwe topnámp ént mek méntér korop mo i konámpón.

Kwapwe kare mér te Kwarompaō ék námpon

13 Aeno yumonap mekamp arop ankárank ninik kouria mér kwapwe námp kwamp te, am arop te námokuráp ninik wampwe pwarará, yonkuae kour sámpaea maok, yae-párák kare ninikaok járakria, arop yaewour i konámp ninik fek tére nánko, arop fárákap nke mwanapon. [◊]

14 Aeno yumo arop ankapan kokwarok tokwaeria, yomoku mwanapan saráp ninik i konap kwamp te, warákár-séri kwapon. Takria te, yumonap ninik támao kar kare apárok sámp-anámp mwanape.

15 Am take pourouráp mér te am te jámar meknámp ék mono. Am te apárokamp ninikono. Am ninik te wokwaekamp kwatae ninikan Satano naropwar nánkárápá yak námpono.

16 Am taknap arop ankwap fárákap te arop ankapan kokwarokrá paokopria maok, ankapan pwarará, námoku mwanapan saráp ninikrá paokopnap arop te fwapia tank mono, nkawakte make kwatae ninik i konapono.

[◊] **3:10:** Ef 4:29 [◊] **3:13:** Ef 4:1-2

17 Aeno arop Kwaromp ninik kour kwapwe sámp nap am te arak i konapon: Manénkir te, yiki kor ninikaok paokop i konapon. Tá wakmwaek, arop ankwap fárákapént ankárankamp ninik fek paokopria, yonkuae porokwe fek yakápria, arop ankwapao sénap kar wawi konapon. Tá arop ankwapan aropompria yaewour. Aeria maok, ankárankamp puri fek arop ponankoran ninik i konapon. Am kwapwe kare ninikaok nap te, kwekár mono, ankár kare kar ampaok i konapon. [◊]

18 Arop fárákap aropao yoporrá yorowar napo, taki kwaponorá yonkuae porokwe pap nap te, am yonkuae porokwe ninik támao yopwar mek ankankou yoronámp niamp nánko, firao karenámp niamp, aropamp paokop mek korop naenámpón. [◊]

4

'Apárokamp ankankan warákár nap te Kwarén yopor napono'rá sénámp kar'

1 Yumo ou mek yoporrá kar yorowar nap te, apae fi kor fek i konapono? Yumokuráp kíkiank ninikao yakria maok, am támao nkawake make ankankantá kíkiankrá, kar séraria maok, am fek táman youpoukwaprá yorowar i konapon. Am te kare nie? [◊]

2 Yumo te ankank kíkiank napao maok, sámp moria, am fek arop tirá wour i konapon. Yumo te ankank kíkiank nap támao, yumo sámp moria yopor yonkuae pwarámprá yorowar i konapon. Yumo ankank sámp mwaria te, Kwarén sér mo i

[◊] **3:17:** Jop 28:28 [◊] **3:18:** Mt 5:9 [◊] **4:1:** Ga 5:17

konapara, am fi kor fek táman yumo am ankank sámp mo i konapono.

3 Yumo am ankank sámp mwaria Kwarén kar toropwap napao, am ankank sámp mo nap fi kor te, yumo Kwarén kar toropwapnap ninik te kwapwe kare mo napara napon. Am te yumoku mwanapan saráp sámp mwaria kikiankria napara, am fi fek táman sámp mo napon. **◊**

4 Yumo Kwarén pwar nap te, yupuao náráp poumarop pwar akwapea, kokoporrá yárak námp niampón. Ae te yumo aráte mér mori kwapon? Apárokamp ankankan kikiánk nap te, yumo Kwarén yopornap arop fákáreno. **◊**

5 Kwaromp Buk fekamp kar te arakrá sénámpón: “Kwaro wokwaek nomp ninik mek Spirit papámpan, nomwan yonkuae touweriaka, námoku náráponoriaka kárákáre námpon.” Yumo má kar te kar mwär ritea nape? **◊**

6 Aeno Kwar te nomwan aropomp tokwae konámpara, Kwaromp Buk fek kar arakrá sénámpón, “Arop námoku tokwae kar nampria waenámp arop te Kwaro man far-pwar konámpón. Aeno arop námokuráp e apárok anámpea porokwe feknámp aropan maok, aropomp i konámpón.” **◊**

7 Yumo te sánánkar porokwe fek yakápria, ankár Kwaro sénámpao tukupria maok, yumo Satanén far-pwar napo, yumwan pwarará farákapá akwap naenámpón. **◊**

8 Yumo ankár Kwaromp wonae fik kar tukup napo maok, nopal Kwaro kor yiráp wonae fik

◊ 4:3: Mt 6:9-13 **◊ 4:4:** 1 Jo 2:15 **◊ 4:5:** Mt 6:24 **◊ 4:6:** Jop 22:29; 1 Pi 5:5 **◊ 4:7:** Ef 6:11-12; 1 Pi 5:8

korop naenámpo. Kwatae ninikráp arop yumo te yiráp kwatae ninik pwar napo, yiráp ninik te yae ént mek yárár napo, yiki kwapwe konámp niamp araknámp nae-námpo. Yumo anánkaopwe ninikráp arop, yumo te am yiráp ninik mek yaknámp kwatae ninik am te nkwampok tirá épéri pwar kipo.

⁹ Yumo te kwatae ninik fek paokop nap kwamp te am fek ninikriaka yonkuae touwea waeriaka ém tárae kip. Yumo oukoumwan amomoránk nap kwamp te, yumo te am amomoránk pwararea, yumo éménk kip. Yumo oukoumwan warákár nap kwamp te, am warákárap ninik te pwarará yonkuae touwea wae kipo.

¹⁰ Kwar Tokwaerao nke námp fek yumo te sánánkar porokwe fek yakáp napo, Kwar Tokwaerao yumwan e tokwae nénk naenámpo.

Kwaro saráp arop yurukup naenámp kar

¹¹ Ononamp fákáre, yiráp ankwapyaenápén kwatae napria wouroump-séri kwapon. Arop ankwapnápén wouroumpria, ‘Amo te kwatae napónorá sénámp te, mao te loan kor kwatae kar séria wouroumprá sénámpo. Táte amo am loan wouroumprá sénap te, amo te lo ankore mek yak monap arop niampono. Amo te arop yurukup i konap arop niamp napon.

¹² Kwar ankáránk námoku am lo pap námpara, námoku maok arop ponankor kotriaka yurukupia fákeyakrá, arop ankwap fárákapan warko érékpria maok, arop ankwap fákáreran kwatae pap naenámpo. Ae naenámpara, amo te wa nap

kwamp, arop ankwap fárákapan wourouumprá sénanapon? [☆]

'Nomokunámpaok paokopi kwapono'rá sénámp kar'

¹³ Yumo arop ankwap fárákapao arakrá sér i konapono: ‘Oukoumwan, tá oumpouran arake fek, nomo ankwap taun mek tukupea ankárang yopwar fek bisnis téreaka mani kápae kare sámp mwar’ ri konapon. Ono yumwan sér rae,

¹⁴ “Yumo te mér mo napon, oumpouran te apae ankank korop kun. Yumo te yiki yakáp mwanap te mokop námpón? Yumo te yaomwi sourirao pokeaka fae tákáre ke fek yakea moyak konámpnámp taknámp mwarea napon.” [☆]

¹⁵ Aeno yumo te arakrá sér kipo: “Kwar Tokwaerao onan takaerianánko te, ono fwap yiki yakria am tére naerá níníknamp ankank takrá tére nanampon.” [☆]

¹⁶ Aeno yumo te yumokuráp níník fek ‘Námo tére tokwae namp’rá warákár-sérar i konapono. Am take pourouráp kwekáp níník te kwatae kareno.

¹⁷ Yumo fwapia níník kip: Arop kwapwe kare níník wae mér námpao, am níníkaok tére mo námp te, am arop Kwaro nke námp fek kwatae níník námpón.

5

Ankank kápaeráp arop fákáreramp kar

¹ Oukoumwan ono ankank kápaeráp arop yumwan sér rae: Yumo te nkawewe make ankank

[☆] **4:12:** Ro 2:1; 14:4 [☆] **4:14:** Lu 12:18-21 [☆] **4:15:** Ap 18:21

kwatae korop naerianámp aran ninikria éménkria fépénénka wae kipo.

² Yiráp ankank kápae kare te turupwiria, yiráp mopor i konap ankank te ponankor sárárao wae fépéri pwar námpono.

³ Yiráp mani gol ntiaka silva te sorok nánko, am mani támao yiráp kwatae ninik érik farákár nánko, mao yiráp pourou ponankor yaomwinámp wouroukoump naenámpo. Oukoumwán wae pwarnámp yae wonae fik námpara, yumo maniráp ankank koupoukour nap te, kwaporok támán napon.

⁴ Yumo fwapia wawenke! Yiráp tére konap aropao yiráp yopwar mekamp fir tia koropea napo, yumo kwekáriaka, mani ponankor nénk moia, ankwapmwaek yumokuráp por pap konapono. Tá am ankwapmwaek pátenap mani támao yoporrá wumwi nánko, am tére arop fárakapamp wumwi karao kor Ponankor Kárákáre Tokwaeráp Tokwae Karamp woupwi mek akwap námpo.

⁵ Yumo mámá apárok yakáp nap fek warákáránk mwanap kokwapwe ankankan ti napon. Yumo fir tokwae fépérrá nununkwi nap te, bulmakauran tokwae kari yak nánko, yankop mwaria nánap nap niamp napon.

⁶ Yumo kwapwe kare aropan kotiaka ankank moráp arop arákarea pap napo, yumwan nopal am fek kar sér mo, wampwe kwaeria pwarará am fek sumpwi námpo. [◊]

*Kárákáre fek fokopeyakrá Jisasén yépék
mwanámp kar*

[◊] **5:6:** Wkp 24:15; Mt 6:19-21; Mk 4:19; 1 Ti 6:9-10

7 Aenámpara, kémpiyae tárápu, yumo te ankár Kwar Tokwae Kar warko ék naenámpara, yépékría kárákáre fek yakáp kipo. Yumo te wae méron: Aropao noump nánko yopwar yoroia pwatea taokeyakáprá yépékrá tukupea, am fir kare nánko fári konapnámp taknámp mwanapon. **◊**

8 Kwar Tokwae warko ék naenámp yae te wae fápae námpara, yumo kor ankár níník kárákáre sámpea, sánánkar yakápria yépékrá kipo. **◊**

9 Ononamp fákáre, yumo te yiráp ankwapyaenápén nonopok yoporrá e-poup sérari kwapon. Am tak nap fek te Jaso yumwan nopal touwe kwatae sánk naerámpón. Yumo fwapia wa kip: Jas ék naeria nánap námp te wae fae námpón. **◊**

10 Ononamp fákáre, yumo te fwapia ník kipo: Profet fákárerao wokwaek kar Kwar Tokwaeramp e fek kar farákápapo, épérépnap aropao man nkawake make napo kuri, mao te kárákáre fek yae-párák kare yakápapon. Yumo kor am fárákapao takiap níník táman sámpea mántwaok kipo. **◊**

11 Nomo má kar te wae mér námpón: Manénkir farákápap arop te, nkawake make kar koropriaka touwe tokwae sámpria kor, kárákáre yakápiakapan, wakmwaek warákárapon. Yumo te Jopomp kar te wae wawiapon. Mao nkawake make ankank nárap pourouk koropámpán kor níník kárákáre sámpea fokopeyakeanánko maok, nánkár wakmwaek Kwar Tokwaerao man yaewouriaka yae-páráki papámpón. Am takimp te, yumo kor wae mér napono. Kwar Tokwae nomwan kor

◊ 5:7: Ga 6:9; Hi 10:36-37 **◊ 5:8:** Fl 4:5; 1 Te 3:12-13 **◊ 5:9:** 1 Ko 4:5 **◊ 5:10:** Mt 5:11-12

yonkwae touweria aropomp saráp yak konámpón.
◊

Fou e sér i konámp kar

¹² Aeno ononamp fákáre, yumo fou e sér mwaria te, yámar mekamp ankankamp e, tá apárok mapekamp ankankamp e, tá ankwap ankankamp e fek kor fou e séri kwapon. Taki nap fek Kwaro yumwan nopal kot naeane. Moan nap kwamp, párák ‘Mono’rá sér, tá karenoria nap kwamp, ‘Yeno’rá sér kip. ◊

Kwapwe kare aropao Kwarén sénámp kar

¹³ Aeno yumo ankwapao nkakwe make kar korop nánko te, mao te Kwarén kar toropwap kun. Tá ankwapao warákárámp kwamp te, tár kar sámpeaka, Kwaromp e sakap kun. ◊

¹⁴ Tá yumo ankwap ankáránk touwe sámpria te, siosén taokeyakáp konap aropan wumwi nánko maok, koropea Kwar Tokwaeramp e fek maomp pourouk wel papria maok, Kwarén ‘Man yaewourae’rá sér mwanapon.

¹⁵ Táte am fárakapao Kwarén mér nap fek kar toropwap napo te, Tokwae Karao am aropamp touwe fwapi pap naenámpono. Aeria mao kwatae ninik sámpá yak nánko te, Kwar Tokwaerao am kwatae ninik ponankor tirá épér naenámpón. ◊

¹⁶ Ae naenámpara, yiráp kwatae ninik ankwapyenaenápén nonopok érik farákápria maok, yumo Kwaro am fárakapan yaewouranoria kar toropwap napo, Kwaro yumwan yaewouriaka yiráp touwe fwapi pap naenámpón. Yae-párák

◊ **5:11:** Jop 42:10-13; 1 Pi 2:19 ◊ **5:12:** Mt 12:36 ◊ **5:13:** Sng 50:15; Kl 3:16 ◊ **5:15:** Snd 28:13; 1 Jo 1:9

kare aropao Kwarén sénámp kar te kárákáre korara, arop ankwap fárákapan fwap yaewour naenámpón.

¹⁷ Elaija te arop námoniamp makerao maok, Kwarén ‘Warákam sámp-kérép kwapono’ ria kárákáre fek sérimpon. Aenko, yinink yopwariaka tokwampok yunk máte warákam ék moi yakánko maok,

¹⁸ warko Kwarén kar toropwapánko, warákam ékria maok, yopwar mekamp fir yae-párák forokrimpon. [◊]

Arop mwae pwar nánko, warámp mwanap kar

¹⁹ Ononamp fákáre, yumonap mekamp arop ankárankao Kwaromp kar kare pwararea, mwar mwaek yáruk nánko, arop ankwapao man warko warámpea korop námp te, mao waeman kwapwe kare ninik námpón. [◊]

²⁰ Yumo te arakrá ninik kip: Arop kwatae mwae-párák akwapnámp aropan warko Kwaronámpok warámp-sankorop námp te, maomp waemp te yaomwi mek akwap mono, Kwaro maomp kápae kare kwatae ninik tirá épéri námpón. [◊]

[◊] **5:18:** 1 Kin 17:1; 18:1,42,45 [◊] **5:19:** Mt 18:15; Ga 6:1 [◊] **5:20:**
1 Pi 4:8

**Kwaromp Kwapwe Kare Kar
The New Testament in the Karkar-Yuri Language of
Papua New Guinea
Nupela Testamen long tokples Karkar-Yuri long
Niugini**

Copyright © 1994 Wycliffe Bible Translators, Inc.

Language: Karkar-Yuri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 26 Jul 2025 from source files dated 31 Aug 2023

7103f8db-88c2-5fec-8ac4-0edfac04e885